

Mid-Day Dogri News Bulletin, 05th June 2025

समे — 12:25

<><><><><><>

PM JK Visit

प्रधानमंत्री नरेन्द्र मोदी होर कल 6 जून गी श्री माता वैष्णो देवी जी दे आधार शिविर कटरा थमां 46 ज्हार करोड़ थमां दे मते दी विकास परियोजना दी शुरूआत करगन। ओह कटरा थमां कश्मीर लेई रेल सेवाएं दा उद्घाटन करडन। कटरा ते बारामूला बश्कार चलने आहली वंदे भारत एक्सप्रेस ट्रेन केई सुविधाएं कन्नै लैस होग ते एहदे राहें जम्मू थमां श्रीनगर लेई पैहली बारी सिद्धा रेल संपर्क बी उपलब्ध होई जाहग। श्री मोदी होर रेल राहें चिनाब पुल थमां कटरा औडन ते इस दरन ओह दुनिया दे सभ्भनें शा उच्चे रेलवे पुल ते अंजी खड्ड आहले रेल पुल दा बी उद्घाटन करडन।

<><><><><><>

Vande Bharat Train

जम्मू कश्मीर च रेल संपर्क गी होर तगड़ा करने गी दिक्खदे होई रेल मंत्रालय नै जम्मू तवी ते श्रीनगर बश्कार चलने आली नमीं वंदे भारत एक्सप्रेस सेवा दे औने जाने दा समें दे यानि एहदा टाइमटेबल पेश कीता ऐ। आकाशवाणी दे जम्मू संवाददाता नै जानकारी दित्ती ऐ जे सैमी हाई स्पीड वंदे भारत रेल सीमित ठैहराह उप्पर चलगन ते जम्मू तवी, श्री माता वैष्णो देवी कटड़ा, बनिहाल ते श्रीनगर इनें चऊं स्टेशनें उप्पर गै रूकोग। रेल मंत्रालय दी अधिसूचना मूजब इस रस्ते लेई दऊं वंदे भारत ट्रेनें गी मंजूरी दित्ती गोई ऐ। एह ट्रेनां हफ्ते च 6 दिन चलगन, जिंदे चा इक दिन रख-रखाह लेई आरक्षत रखेआ गोदा ऐ।

<><><><><><>

World Environment Day

अज्ज पर्यावरण सरबंधी कुल संसारी ध्याड़ा मनाया जा'रदा ऐ। एह ध्याड़ा प्राकृति ते धरती गी बचाने लेई पर्यावरण स्थाबै सकरात्मक कारवाई करने लेई कुल संसारी सतह पर जागरूकता बधाने लेई मनाया जंदा ऐ। संयुक्त राष्ट्र पर्यावरण कार्यक्रम तैहत 1973 थमां हर

ब'रे 5 जून गी धरती गी बचाने लेई जागरूकता बधाने लेई एह ध्याड़ा मनाया जंदा ऐ। इस ब'रे विश्व पर्यावरण दिवस दा विषय ऐ—प्लास्टिक प्रदूषण गी हराना।

<><><><><><>

Ramsar Sites

भारत थमां 2 होर वैटलैंड गी रामसर स्थलें दी सूचि च शामिल कीता गेआ ऐ, जेहदे कन्नै देसै च इस चाल्ली दे थाहरें दी गिनतरी 91 होई गेई ऐ। भारत च रामसर स्थलें दी सूचि च मसां शामिल होने आली थाहरें च फलोदी दी खिचन ते उदयपुर दी मेनार शामिल ऐ। एह दौनें थाहरां राजस्थान च न। प्रधानमंत्री नरेन्द्र मोदी होरें पर्यावरण संरक्षण लेई भारत दी लगातार हुंदी तरक्की दी सराहना कीती ऐ।

<><><><><><>

NIA Searches

राष्ट्री जांच एजेंसी — एनआईए आसेआ आतंकवाद कन्नै सरबंधत मामले च जम्मू—कश्मीर च 32एं थाहरें पर छापे मारे जा करदे न। एह छापेमारी, आतंकवादी षडयंत्र आहले मामले च बक्ख—बक्ख आतंकी गुटें दे ओवर ग्राउंड वर्करें खलाफ थहोई दी पक्की सूह दी बिनाह उप्पर अज्ज बड्डलै सवेला थमां गै कीती जा'रदी ऐ।

<><><><><><>

Special Feature 11 years of Govt.

भारत च सेवा, सुशासन ते गरीब कल्याण दे सिद्धांतें थमां प्रेरित होइयै इक दहाके च महत्वपूर्ण तब्दीलियां आइयां न। आकाशवाणी समाचार तुं'दे लेई पिच्छले 11एं ब'रें च प्रमुख खेत्तरें च सरकार दे जतनें बारै इक बशेश फीचर लेइयै आया ऐ। अज्ज, अस शिक्षा ते खेड्डें पर ध्यान केंद्रित करै करने आं — जेहड़े भारत दी अमृत पीढी यानि युवा पीढी गी सशक्त बनाने दी बुनियाद न। शिक्षा दे खेत्तर बक्खी चेचा ध्यान दि'दे होई सरकारै इक महत्वकांक्षी रूपरेखा तैयार कीती ऐ। 2014 थमां देसै च उच्च शिक्षा इदारे दी गिनतरी 51 जहार शा बधियै 70 जहार दे पार होई गेदी ऐ ते आईआईटी, आईआईएम ते एम्स ज्नेय इदारे दा बी व्यापक विस्तार कीता गेआ ऐ। इ'आं गै खेड्डें दे खेत्तर गी बी सरकारै बड़ी मती

तरजीह दित्ती ऐ। खेलो इंडिया अभियान दे तैहत 1 जहार शा मते सिखलाई केन्द्र खोले गेदे न ते 3 जहार शा मते युवा खड्डारिएं गी सलाना 6 लक्ख 20 जहार रुपें दी मदाद हासल होआ करदी ऐ।

<><><><><><>

Yoga Samagam

मुख्य भरै दे 30 जहार थमां मते संगठनें इस ब'रे अंतर्राष्ट्रीय योग दिवस दे मौके पर मुख्य कार्यक्रमें योग संगम 2025 च हिस्सा लैने लेई पंजीकरण करोआया ऐ। इस ब'रे दा योग संगम रिवायती योग अभ्यास थमां अगगे बधियै लचीलापन ते सद्भाव गी बढ़ावा देने आली राष्ट्रव्यापी पैहल दा रूप लै'रदा ऐ। एहदा आयोजन आयूष मंत्रालय आस्सेआ कीता जा'रदा ऐ। शैक्षणिक संस्थानें ते रजिडेंट वेलफेयर एसोसिएशनें थमां लेइयै एनजीओ, कॉरपोरेट घरानें ते सरकारी संगठनें तगर देश भरै दी संस्थाएं 21 जून गी अंतर्राष्ट्रीय योग दिवस दे मौके उपपर कार्यक्रम आयोजित करने लेई अपनी इच्छेआ दर्ज करोआई ऐ। इस ब'रे योग दिवस दा विशे सार ऐ, "इक घरती इक सेहत लेइ योग"। 11में अंतर्राष्ट्रीय योग दिवस पर लद्दाख दी शांत पहाड़ी चोटिएं थमां लेइयै केरल दे जीवंत समुंद्री कंडे, स्कूलें दे मैदाने थमां लेइयै कॉर्पोरेट परिसरें ते एतिहासक मंदरें ते व्यस्त रेलवे स्टेशनें तगर बक्ख—बक्ख थाहरें पर योग दे सत्र आयोजित कीते जांगन।

<><><><><><>

Ramban Yoga

रामबन दे आयूष विभाग नै औंदे अंतर्राष्ट्रीय योग दिवस 2025 दी तैआरिएं दे रूपै च मैयात्रा दे समुदायक हाल च आयूष ते योग सरबंधी इक जाग्रती सत्र दा सरिस्ता कीता। एहदा मुख्य मकसद मकामी लोकें, विद्यार्थिएं ते समाज दे होर दुए तब्के दे लोकें गी योग गी अपने जीवन दा हिस्सा बनाने लेई प्रेरत करना हा। इस मौके उपपर टीम दे सदस्यें लोकें गी आर्युवेदा योग युनानी सिदया ते होम्योपैथी दे योगदान ते महत्व बारे जानकारी कीता।

<><><><><><>